


YONKE INGANE ENGAKAZIMELI INELUNGELO LOKONDLIWA



Wubani ingane engakazimeli?

Yinoma iyiphi ingane engakakwazi ukuzondla ngisho noma ngabe abazali behlukanisile noma bengazange bashade. Yonke ingane kumele iphathwe ngokulinganayo ngabazali bayo, ingane yomshado wokuqala ingeke izuze kangcono kunengane yomshado wesibili noma ezalwe ngaphandle komshado.

Siyini isondlo?

Lokhu yilezozinto ingane ezidingayo ukuze iphile futhi ikhule kahle, ukudla, izembatho, ikhaya, ukwelashwa, nemfundo.

Wubani okumele akhokhe isondlo sengane engakazimeli?

Bobabili abazali banejoka ngokomthetho ukunika ingane isondlo. Inani lesondlo somzali ngamunye siya ngokuthi lowomzali amandla akhe angakanani; uma unina eholo kancane kunoyise uyokhokha kancane; uma unina engasebenzi uyise esebenza, uyise kumele akhokhe sonke isondlo.



Sifakwaphi isicelo sesondlo?

Yonke inkantolo kamantshi yesifunda sakho iyinkantolo yezondlo futhi. Kuyinkantolo ebhekene nje nezondlo ngisho nabashushisi babekwa njengonobhala bezondlo.


Wubani okumele akusize ukufaka isicelo sesondlo?

Ngokomthetho lowo ongunobhala wesondlo kumele akusize ukufaka isicelo. Unobhala wezondlo uyodinga yonke imininingwane yalowo okumele akhokhe isondlo ngokomthetho:

- lapho esebenza khona,
- igama lomqashi wakhe,
- iholo lakhe,
- lapho ehlala khona,
- amagama aphelele kanye nenombolo kamazisi wakhe.

Kungenziwa-njani uma owesilisa ethi ngeke akhokhe isondlo ngoba ethi ingane akusiyona eyakhe?

Uma owesilisa engafuni ukukhokha isondlo ngoba eyiphika leyongane ukuthi ingeyakhe, inkantolo inganquma ukuthi kusetshenziswe izindlela zobuchwepheshe ukuhlola ukuthi ingane ngeyakhe noma qha. Uma inkantolo yaneliswa wukuthi unina noyise wengane ngeke babenamandla okukhokhela ukuhlolwa iyonquma ukuthi uhulumeni akhokhele lokho kuhlolwa.



Kungenziwa-njani uma inkantolo yanqumela umuntu ukuba akhokhe isondlo kodwa engakhokhi noma esevele wanqamuka ukukhokha?

Unobhala wezondlo kumele akusize uma inkantolo yakhipha isinqumo sesondlo kodwa ungatholi mali. Unobhala kumele aphenye isikhalo ukuthola ukuthi yini ungayitholi imali aqinisekise ukuthi uyayithola.

Ungayibiza naleyo esalele emuva kusukela inkantolo yenza isinqumo. Lokhu kufaka nenzalo yaleyomali okwakumele ukuba ngabe ikhokhelwe wena.

Kwenzekani kulowo onqunyelwe ukukhokha isondlo kodwa ongasikhokhi?

Lowo owanqunyelwa ukukhokha isondlo kodwa ongasikhokhi noma anqamule ukukhokha, weqa umthetho ngakho unecala, ngisho noma ngabe uphuthwe ukukhokha kanye.

Lowo onecala lokungakhokhi angahlawuliswa noma adonse ejele isikhathi esifika onyakeni; kwesinye isikhathi angeke ahlawuliswa kodwa avele agqunywe ejele.

Kumele wenzenjani uma uthutha uyohlala kwenye ingxenye yezwe?

Uma inkantolo yalapha usuka khona yakunika isinqumo sesondlo kumele wazise unobhala wezondlo ukuthi uyathutha bese umnika imininingwane yalapho uya khona.

Isinqumo senkantolo nemininingwane efanele kuyothunyelwa enkantolo yalapho uya khona kubhaliswe khona. Lokhu kusemqoka ngoba uma isondlo singakhokhwa kumele ufake isikhalo enkantolo yalapho usuhlala khona.



Uyafisa ukwazi kabanzi ngamandla inkantolo enawo ukunika isinqumo sesondlo futhi isilandelele?

Isibonelo:

- Inkantolo yezondlo inamandla okuphoqelela noma wubani ukuvela phambi kwayo aveze noma incwadi, umbhalo, umbiko (njengowezimali/namaholo) kulolophenyo.
- Inkantolo ingamhlala ngecala lowo obekumele avele phambi kwayo kodwa ahluleke ukuvela kuleyonkantolo.
- Inkantolo inganqumela noma wubani omunye oseceleni, njengomqashi ukukhokha isondlo abambe emholweni noma emalini ekweletwa lowo okumele akhokhe isondlo.
- Inkantolo ingashintsha isinqumo esikhona yenze esinye esikhundleni saso.
- Inkantolo ingenza isinqumo sokukhokhwa kwazonke izindleko zikanina wengane kusukela mhla izalwa kuze kuzofika osukwini okubanjwe ngalo uphenyo.
- Inkantolo inganquma ukuthi umuntu akhokhe zonke izindleko zokwelashwa kwengane futhi iphoqelele lowo okumele ayondle ukuthi ayifake phansi kohlelo lwakhe lokwelashwa (medical aid).
- Inkantolo yezondlo inamandla okufezekisa izinqumo ngisho nangokudla impahla, imiholo, nezikweletu ezikweletwa lowo onqunyelwe ukukhokha.